

Cynhaliwyd Mabolgamapau'r
ysgol ar 29 Mehefin. Stewi
gipiodd darian y Gymdeithas
Rieni Athrawon o dan
gapteniaeth Sioned Thomas ac
Adrian Paddock. Roedd Seilo
yn dynn ar ei sodlau, diolch
i ymdrechion y ddau gapten
Melanie Evans ac Alun Price.
Lisa Humphreys enillodd Dlws
Cyril Evans a'i Fab am ei
chyfraniad i chwaraeon yn
ystod y flwyddyn. Aeth
Tarian Dylan a Hywel
Griffiths am y nifer uchaf o
bwyntiau yn y mabolgampau i
Jason Davies,

Aeth llond bws o blant i
fabolgampau'r cylch ym
Mlaendolau ddechrau
Gorffennaf gan wneud gwaith
canmoladwy iawn. Yna
cynhaliwyd Gala nofio'r
ysgol ar y prynhawn Mawrth.

7 Gorffennaf oedd diwrnod
ein gwibdaith eleni. Aeth
dosbarth 1 a 2 i Dywyn ac
oddi yno ar drên bach
Talyllyn i Ddolgoch,
Abergynolwyn a Nant Gwernoil
cyn troi am adre drwy
Dalyllyn a Chorris.
Mwynhaodd pawb eu hunain er
gwaethaf anwadalrwydd y
tywydd. Bu'r plant hynaf yn
sgio yn Nhrawsfynydd cyn
mynd ymlaen i Geudyllau
Llechwedd, Blaenau
Ffestiniog. Cawsant ddiwrnod
pleserus tu hwnt. ↗